

दिनांक 16.03.2025

समय: 18.45 बजे

आकाशवाणी जयपुर-अजमेर

समाचार

- देश ने स्वस्थ अर सक्रिय बनाया राखबा खातर **फिट इंडिया महोत्सव** आज सूं सरू—स्वास्थ्य जागरूकता ने लेर केई खेल गतिविधियां राखी जावेला।
- प्रधानमंत्री नरेन्द्र मोदी जीवन रा केई पहलुआं अर अनुभवां माथे **पॉडकास्टर लेक्स फ्रिडमैन** रे सागे बातचीत करी—कया— हर देशवासी रा मन मांय राष्ट्र हित रो भाव जरूरी।
- केन्द्रीय मंत्री गजेन्द्र सिंह शेखावत जोधपुर अर फलोदी जिलां री विकास समन्वय समितियां री बैठक ली—गर्मी मांय पीबा रा पाणी री सुचारु व्यवस्था करबा रा निर्देश दिया।
अर
- मेवाड़ राजघराना रा आला सदस्य अर समाजसेवी अरविन्द सिंह मेवाड़ देवलोक व्ह्या—पर्यटन अर कला संस्कृति जगत मांय दुःख की लहर—काल वां रो दाग व्हेला।

000

केन्द्रीय युवा मामला अर खेल मंत्री डॉक्टर मनसुख मांडविया, आज सिंज्यां नई दिल्ली रा जवाहर लाल नेहरू स्टेडियम मांय पैला **फिट इंडिया महोत्सव** रो उद्घाटन कर रिया है। उद्घाटन जळसा मांय युवा मामला अर खेल राज्य मंत्री **रक्षा खडसे**, केई फिल्मी सितारा, पहलवान, फिटनेस शौकीन अर वेलनेस गुरु भी शामिल व्हे रिया है। तीन दिन रा फिटनेस अर **वेलनेस फेस्टिवल—फिट इंडिया महोत्सव** रो लगस स्वस्थ अर सक्रिय जीवनशैली ने बढावो देणो है। फिट इंडिया महोत्सव रे दौरान रस्सी कूदबा, आर्म रेसलिंग, क्रिकेट बॉलिंग, स्क्वॉट अर पुश—अप चैलेंज समेत केई खेल गतिविधियाँ खास आकर्षण रेवेला। इण मांय भारतीय खेल प्राधिकरण रा राष्ट्रीय खेल विज्ञान अर अनुसंधान केंद्र, लोगां ने पोषण विशेषज्ञां अर मनोवैज्ञानिकां सूं जुड़ी मुफ्त जाणकारी मुहैया करावेला। इण मौके आवता **खेलो इंडिया पैरा गेम्स** रा शुभंकर, लोगो अर गान रो भी अनावरण करयो जावेला। खेलो इंडिया पैरा गेम्स 20 सूं 27 मार्च रे बीचे दिल्ली मांय व्हेला।

इण बीच केन्द्रीय युवा मामला अर खेल मंत्री डॉ. मनसुख मांडविया आज सुंवारे अहमदाबाद मांय साबरमती रिवरफ्रंट माथे **“फिट इंडिया — रविवार को साइकिल पर”** अभियान मांय भाग लिया। कार्यक्रम मांय करीब साढे छः सौ साइकिल सवार भाग लीना। कार्यक्रम ने सम्बोधित करता थकां डॉ. मांडविया कया के साइकिल चलाबा सूं प्रधानमंत्री नरेन्द्र मोदी रा **‘विकसित भारत’** रा संकल्प ने पूरो करबा मांय इमदाद मिल सके है।

000

प्रधानमंत्री नरेन्द्र मोदी जान्या—मान्य पॉडकास्टर लेक्स फ्रिडमैन रे सागे केई मुद्दा माथे बातचीत करी। इण चर्चा रो प्रसारण आज सिंज्या सोशल मीडिया माथे कर्यो जावेला। इण पॉडकास्ट मांय प्रधानमंत्री आपरा जीवन सूं जुड्या अनुभव साझा कर्या। प्रधानमंत्री बचपन, हिमालय मांय बितायो गयो टेम अर सार्वजनिक जिन्दगी समेत केई मुद्दा माथे चर्चा करी गई। श्री फ्रिडमैन कया के वणा तीन घंटा तांणी प्रधानमंत्री मोदी रे सागे बातचीत करी। प्रधानमंत्री आपरा बीत्या दिनां ने याद करता थकां कया के मन मांय यो भाव व्हेणो चाहिजै के म्हे समाज अर देश ने कांई दे रिया हा। ओ नी के म्हाने आं सूं कांई मिल्यो? प्रधानमंत्री कया के हर व्यक्ति ने याद राखणो चाहिजे के रात कित्ती हो भोर जरूर होबे है।

0000

प्रधानमंत्री नरेन्द्र मोदी काल नुवी दिल्ली मांय न्यूजीलैंड रा प्रधानमंत्री क्रिस्टोफर लक्सन रे सागे रायसीना डायलॉग 2025 रो उद्घाटन करेला। रायसीना डायलॉग रो यो दसवो संस्करण 19 मार्च ताई चालेला। इण आयोजन मांय शामिल देश, वर्तमान भू-राजनीतिक अर भू-आर्थिक समेत केई मुद्दा माथे चर्चा करे है। इण सम्मेलन मांय भाग लेबा खातर केई देशां रा नेता नई दिल्ली पूग रिया है। इण मांय लक्जमबर्ग अर क्यूबा रा उप-प्रधानमंत्री, घाना, पेरू अर स्लोवेनिया रा विदेश मंत्री शामिल है।

इण रे अलावा मालदीव रा पेली रा राष्ट्रपति मोहम्मद नशीद भी डायलॉग मांय शिरकत करबा नुवी दिल्ली पूग गया है।

000

मुख्यमंत्री भजनलाल शर्मा आज राजभवन मांय राज्यपाल हरिभाऊ बागडे सूं मुलाकात करी। इण दौरान मुख्यमंत्री राज्य रा विकास सूं जुड्या मुद्दा माथे राज्यपाल रे सागे चर्चा करी। दोन्यू रे बीच या शिष्टाचार भेंट ही। मुख्यमंत्री राज्यपाल ने होळी री शुभकामनावां दी। केंद्रीय कृषि राज्य मंत्री भागीरथ चौधरी भी राज्यपाल सूं आज शिष्टाचार भेंट करी। इण दौरान वणा राज्यपाल सूं जैविक खेती अर कृषि विकास सूं जुड्या मुद्दा माथे चर्चा करी।

000

केन्द्रीय पर्यटन अर संस्कृति मंत्री गजेन्द्र सिंह शेखावत आज जोधपुर अर फलौदी जिला री जिला विकास समन्वय अर निगरानी समिति री बैठक ली। केन्द्रीय मंत्री दोन्यू जिलां मांय चाल री केन्द्रीय योजनावां अर सामुदायिक विकास री गतिविधियां रो फीडबैक लेर जरूरी निर्देश दिया। श्री शेखावत दोन्यू जिलां मांय पीबा रा पाणी री समीक्षा करता थकां विभागीय अहलकारां ने गर्मी रा मौसम रे दौरान जरूरी व्यवस्थावां पक्की करबा ने कया। वणा बंद पड्या हैडपम्प अर ट्यूबवेलां री मरम्मत कर पेयजल वितरण रा काम ने प्राथमिकता सूं लेबा ने कया। श्री शेखावत कन्टिनजेंसी प्लान रा इण म्हीणा रे आखिर ताई करबा खातर अहलकारां ने ताममेल रे सागे काम करबा ने कया। वणा जोधपुर अर फलौदी जिलां मांय टीबी रोगियां खातर नि-क्षय मित्रां री संख्या बढावा अर मौसमी बीमारियां माथे काबू करबा खातर योजना बनार काम करबा रा हुकम दिया। बैठक मांय संसदीय कार्यमंत्री जोगाराम पटेल, सांसद पीपी चौधरी अर स्थानीय जनप्रतिनिधियां रे सागे प्रशासनिक अहलकार मौजूद रिया। इण दौरान केन्द्र सरकार री न्यारी न्यारी योजनावां री प्रगति रा बारा मांय बतायो गयो।

000

मेवाड़ राजघराना रा आला सदस्य अर समाजसेवी महाराणा अरविन्द सिंह मेवाड़ आज उदयपुर मांय देवलोक व्हे गया। वे थोडी टेम ऊं बीमार हा। वां रा निधन री सूचना सूं समुचा मेवाड़ हलका अर समर्थकां मांय दुख रो माहौल है। श्री मेवाड़ रा देवलोक व्हेवा माथे मुख्यमंत्री भजनलाल शर्मा, चिकित्सा मंत्री गजेन्द्र सिंह खींवर अर केन्द्रीय मंत्री गजेन्द्र सिंह शेखावत समेत न्यारा न्यारा सामाजिक संगठन गहरो दुख जताया है। श्रीजी अरविन्द सिंह मेवाड़ महाराणा मेवाड़ चैरिटेबल फाउंडेशन, सिटी पैलेस अर एकलिंगजी ट्रस्ट समेत केई संस्थावां रा प्रबंधक हा। वणा शिक्षा, पर्यटन अर विरासत संरक्षण रा हलका मांय मेहतब जोग काम कर्यो। अरविन्द सिंह मेवाड़ रो काल अंतिम संस्कार कर्यो जावेला। वां री अंतिम यात्रा ऐतिहासिक सिटी पैलेस सूं सरू व्हे र शहर रा न्यारा न्यारा रास्ता सूं होती व्ही महासतिया पूगेला।

000

जैसलमेर मांय काल **अटल जन सेवा शिविर** राख्या जावेला। त्रि-स्तरीय जनसुनवाई अर समस्यावां ने दूर करबा बाबत ब्लॉक स्तर माथे ये शिविर लगाया जावेला। म्हाका संवाददाता बताया के इण बाबत पेली राख्या गया अटल जन सेवा शिविर अर राजस्थान संपर्क पोर्टल रा लंबित अर असंतुष्ट मामलां री सूचि बनार वां रो हल काढ्यो जावेला।

000

किसाना रा कौशल विकास अर पशुपालकां ने दूध उत्पादन मांय बढोतरी अर तकनीक री जाणकारी खातर हरियाणा रा करनाल मांय आज सूं कृषि प्रशिक्षण शिविर सरू व्ह्यो। शिविर मांय भाग लेबा

राजस्थान सूनू भी बड़ी तादाद मांय कशतकार अर पशुपालक पूग्या है। झालावाड सूनू 40 प्रगतिशील काशतकारां रो दळ प्रशिक्षण खातर रवाना व्हीयो। सात दिन रा इण शिविर मांय वैज्ञानिक विधि सूनू दूध उत्पादन, पशुपालन अर मछली पालबा री तकनीक माथे विशेषज्ञां कानी ऊं किसानां ने जाणकारी दी जावेला।

000

होळी सूनू सरू व्ही गणगौर पूजन रा तीसरा दिन आज भाई दूज पूजा करी गई। महिलावां सुखसमृद्धि री कामना अर भाईयां री लंबी उमर खातर दूज पूजा करी अर माता रे भोग लगायो। अटी ने प्रदेश मांय केई ठोडां माथे परम्परागत रूप सूनू सूरज आठ रोटा माथे सूर्य री पूजा करी गई। पाली मांय सुहागिनां व्रत रो उद्यापन कर्यो अर कन्यावां ने भोजन करार पूजा-अर्चना करी। हनुमानगढ मांय भी सूरज रोटे रा मौके माथे गणगौर रा गीतां रे सागे महिलावां पारम्परिक रूप ऊं लोकनृत्य पेश करया।

000

प्रदेश मांय लारला दो-तीन दिनां मांय मौसम मांय व्हीया बदळाव रे पाछे आज बत्ता जिलां मांय मौसम सूखो रह्यो। बीकानेर संभाग मांय कठे-कठे हल्को मेह बरस्यो। मौसम महकमा कानी ऊं बत्तो तापमान चित्तौडगढ मांय 38 दशमलव 7 डिग्री सैल्सियस दर्ज कर्यो गयो। मौसम विभाग रे मुजब आवता तीन-चार दिनां ताई मौसम सूखो रह सके है। इण दौरान बत्ता तापमान मांय थोडी कमी आ सके है।

000